

Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaata allanngortinneqarneranik Inatsisartut inatsisaat nr. 6, 15. april 2011-imeersoq (atuuffianik annertusisitsineq kiisalu ingerlaannartumik akiliisarnissamik piunasaqaat)

§ 1

Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaanni nr. 3, 2. maj 1996-imeersumi, Inatsisartut inatsisaatigut nr. 7, 5. december 2008-meersukkut kingullermik allanngortinneqartumi makku allannguutigittinneqarput:

1. § 5, imm. 1, ima oqaasertaqarpoq:

” § 5. Akileraarutinut akiliutaavallaarsimasut utertinneqalerneranni kommunit, pissarsisussap utertitassanngorlugit ikiorsiissutinut, pilersuisussaataitanermut akilersuutinut siumoortumik tunniunneqartartunut, inuussutissarsiutitigut suliffeqarfinnut aningaasatigut attartortissimasanut, kommunit inuussutissarsiutitigut suliffeqarfinnut il.il. aningaasaliinermikkut inuussutissarsiutinik ineriartortitseqataasinnaaneranunneq ataatillugu pisassarisanut, kiisalu paaqqinnittarfinni angerlarsimaffinnilu ulluunerani paaqqinnittarnermut, eqqaanermut pujoorfinnillu paaviaanermut pisassarisanut akilerneqartussanngoreersimagaluartunut akiligassarisaanut naapertuuttunik ilanngartuisinnaatitaapput.”

2. § 5-imi imm. 1-ip kingorna immikkoortutut nutaatut ilanngunneqarpoq:

” Imm. 2. Akileraarutinut akiliutaavallaarsimasut utertinneqalerneranni inuinnaat, pisasaqartumut pilersuisussaataitanermut akilersuutinut akilerneqartussanngoreersimagaluartunut naapertuuttunik ilanngartuisinnaatitaapput.”

Imm. 2 taamaasilluni imm. 3-nngorpoq.

3. § 6-ip kingorna qulequtaq nutaaq ilanngunneqarpoq:

”Akiitsoqalernissamik pinaveersaartitsineq”

4. Qulequttap nutaap kingorna ilanngunneqarpoq:

”§ 6 a. Inuit imaluunniit inatsisitigut pisinnaatitaasut pisussaataitaasullu aningaaseriviup Kalaallit Nunaanni, Savalimmiuni Danmarkimiluunniit angerlarsimaffeqartup ingerlaannartumik akiliisarnissamik aqqissuussinermik neqeroorutaanut ilanngunnissaat pisortat oqartussaasut piunasaqaatigisinnaavaat. Tassunga ataatillugu aningaasanngorlugit akiliutit akiligassanut naammassinnissutaanissaat pisortanit oqartussaasunit itigartinneqarsinnaavoq.

Imm. 2. Aalajangersakkami pineqarput pisortanut aalajangersimasumik akiliutaasartut tamarmik, matumani ilanngullugit akileraarutinut akitsuutinullu akiliutit kiisalu nioqqutissanut sullissinernullu akiliutit.

Imm. 3. Inuit imaluunniit inatsisitigut pisinnaatitaasut pisussaatitaasullu ingerlaannartumik akiliisarnissaq pillugu aningaaserivimminnik isumaqatigiissuteqarfiginnissinnaanngitsillugit imm. 1 atuutissanngilaq.

Imm. 4. Inuit aamma inatsisitigut pisinnaatitaasut pisussaatitaasullu pisortanut oqartussaasunut akiliisarnerat pillugu, matumani ilanngullugu inuk ingerlaannartumik akiliisarnissaq pillugu aningaaserivimmik isumaqatigiissuteqarfiginnissamut periarfissaqanngitsillugu maleruagassat erseqqinnerusut Naalakkersuisunit aalajangersarneqarsinnaapput.”

§ 2

Inatsisartut inatsisaat ullormi 1. juli 2011-mi atuutilissaaq.

Kalaallit Nunaanni Namminersorlutik Oqartussat, ulloq 15. april 2011

Kuupik Kleist